



Nianatra ny Fanekena Izy, ka tonga fototry ny famonjena ho an'izay manaiky Azy.

Ry Kristianina havana, mbola ao anatin'ny hateloana masina isika. Omaly isika no nankalaza sy nandinika ary niaraka niditra tamin'i Jesoa amin'izao hateloana masina izao tamin'ny fankalazana ny

Vakiteny I : Iz. 52, 13 - 53, 12

Tononkira : Salamo 115

Vakiteny II : Heb. 4, 14-16 ; 5, 7-

9Evanjely : Jo. 18, 1-40; 19, 1-42

Alakamisy masina izay nanorenan'i Jesoa ny famonjena antsika. Tanteraka izany famonjena izany raha nanolotra ny ainy tamin'ny alalan'ny vatana sy ràny Izy tamin'ny Eokaristia sy nanasa ny tongotry ny mpianany anambarany fa ny làlam-pamonjena dia ny fahafoizana, ny fanompoana anatin'ny fahamarinana lavitra ny fihatsaram-belatsihy, ka

nilazany hoe : "ataovy izao ho fahatsiarovana ahy". Izany indrindra no tanteraka amin'izao Zoma masina izao ka mangina ny tany satria mahatsiaro ny fijaliana sy nahafatesan'ny Tompo izay foto-kevitra lehibe ankalazaintsika androany rahateo. Toa resy isika satria maty tokoa ny tompontsika nefa ny ankalazaintsika dia tsy ny fahafatesana mankany amin'ny faharesena sy fahaverezana fa fahafatesana manambara fandresena ny ratsy, fandresena ny fahotana.

Anatin'ny fahanginana isika no mitsakotsako izany rehetra izany kanefa ao anatin'ny fahanginana manambara fandresena satria matoky isika fa raha miara-maty Aminy amin'ny fahotana dia miara-mitsangana Aminy ka ny fahafatesana no levona ao amin'ny fasana fa aim-baovao kosa no mivoaka avy ao. Izany no andrandraintsika. Fahanginana feno fanantenana sy fitiavana no ankalazaintsika amin'izao andro zoma masina izao fa indrindra amin'ity taon-jobilyn'ny Fanavotana antsika ity. Izao tokoa ny fankalazana ny Fanavotana. Tanteraka manontolo eto izay fanavotana izay ka mihavana ary mivondrona amin'i Jesoa izao rehetra izao ka miova tokoa ny zava-drehetra. Tsy nofinofy intsony izany ankehitriny ka mihavana izao ny tany aman-danitra ao amin'i Jesoa. Mihavana amin'ny zava-boary ny olombelona tsy mpifahavalo intsony fa mifampitsimbina. Torak'izany ny olombelona rehetra Olo Araiky ao amin'i Jesoa, Mpiray Tompo ka mifanasoa mikatsaka ny soa iombonana. Fianakaviamben'Andriamanitra isika jiaby ka miara-manorina indray ny Tranobe Iombonana efa robaka ka miara-mankalaza sy midera an'Andriamanitra.

Mizara efatra ny fankalazana ahafahantsika mivelona izany rehetra satria ny fankalazana ho antsika dia ny fiainana ny asan'ny Fanahy Masina. Aoka àry harahintsika tsara.

Ny fizarana voalohany dia fandinihantsika an'i Jesoa nijaly sy maty amin'ny alalan'ireo vakiteny naroso amintsika fa indrindra ny evanjely izay manohy ny efa voalaza ao amin'ny vakiteny voalohany izay manomana antsika bebe kokoa amin'ny andro anio. Ao koa ny fitantaran'izaia ny nanjo an'i Jesoa ao amin'ny vakiteny voalohany. Faminaniana no nataon'izaia nefa toy ny nanatrika mihitsy izy satria voatantarany amin'ny antsipiriany ny nanjo an'i Jesoa...

Ny fizarana faharoa dia fivavahana amin'ny alalan'i Jesoa mba ho famonjena ny olona rehetra maneran-tany. Ranombavaka manetriketrika no filazantsika azy, ranombavaka anolorana an'izao tontolo izao amin'Andriamanitra mba ho izao tontolo izao vaovao tokoa no ateraky ny fankalazana ny Paka. Ny vokatry ny fijalian'i Jesoa dia ilay fiainam-baovao entin'ny Paka izany hoe ny fifandraisana amin'Andriamanitra mirindra araka ilay fihavanana nentin'i Jesoa izay tanteraka tamin'ny alalan'ny hazo fijaliana : ny fifandraisantsika samy olombelona ho fianakaviana iray ao amin'Andriamanitra izay fihavanana sy fitiavana tena izy fa tsy sentosento, ny fifandraisana vaovao amin'ny zava-boahary. Hiezaka isika mba hifanaraka amin'ny fiainana maha zanak'Andriamanitra antsika ny fanajantsika ny zava-boahary fa tsy hanjakazaka na handrava isika.

Ny fizarana fahatelo dia ny fitsaohana sy ny fanajana ny hazo fijaliana masina. Mitsaoka an'i Kristy tamin'ny hazo fijaliana isika hanambarantsika fa io no fototry ny famonjena antsika.

Ny fahefatra dia ny sakramentan'ny Eokaristia, mandray ny vatana sy ran'i Kristy mpamonjy antsika isika. Tsy misy lamesa androany fa mandray ny komonio ho fiombonantsika Aminy.

Ny vakiteny voalohany bokin'izaia mpaminany dia efa manambara amintsika izay hanjo an'i Jesoa ilay mpanompon'Andriamanitra *"Toy ny nigagan'ny maro nahita Azy, - fa rava Endrika loatra Izy, ka ny Tarehiny efa hoatra ny tsy tarehin'olombelona intsony; ary ny Tavany efa hoatra ny tsy tavan-janak'olombelona intsony, - no hampiontanany firenena maro."*

Izany tokoa no nanjo an'i Jesoa sy nitondrany ny fitiavan'Andriamanitra amintsika ary tsy takapolopolorina izany halehiben'ny fitiavany antsika izany. Milaza koa i Md Paoly amin'ny taratasiny ho an'ny Romana 5: *"Fa izao kosa no nanehoan'Andriamanitra ny fitiavany antsika: fony mbola mpanota isika no maty hamonjy antsika ny Kristy; koa mainka fa izao efa nohamarinina tamin'ny rany izao, dia tsy maintsy afahany amin'ny fahatezerana mihitsy"*

Ny ankalazaintsika amin'izao Zoma masina izao dia ny fitiavan'Andriamanitra antsika olombelona izay abaribarian'io fijalian'i Jesoa sy ny famantsihana Azy tamin'ny hazo fijaliana io. Mampiseho ny fitiavany antsika Andriamanitra tamin'ny nanirahany ny zanany lahitokana ho amin'izao tontolo izao mba hahavelona antsika amin'ny alalany. Tsy isika no tia an'Andriamanitra rahateo fa Izy no tia antsika. Tanteraka izany amin'izao fibanjinantsika ny hazo fijaliana izao.

Mifikira àry isika ry Kristianina havana amin'ny hazo fijaliana, ampandrosoy ao an-tranontsika ny hazo fijaliana fa handray ny famonjen'i Kristy isika sy ireo izay mandalo ao an-tranontsika koa.

Maro ny olona voalaza amin'ny tantaran'ny famonjena antsika amin'ny evanjely izay novakina tamintsika amin'izao fankalazana ny Zoma masina izao. Anjarantsika no mandinika aiza amin'izy ireo no mba misy antsika ? Raha atambatra indray miaraka ireo olona rehetra voatantara ireo dia azo

lazaina fa ny toetrantsika olombelona dia hita ao anatin'ireo olona marobe nanodidina ny Fijalian'i Jesoa Kristy Tompontsika nosoratan'i Md. Joany.

Raha mandinika an'i Pilaty isika dia tsapantsika ny anjara toeran'ireo manam-pahefana. Manana fahefana isika amin'ny toerana misy antsika tsirairay avy ary matetika tsy mahay mandalanjanja izany fahefana izany satria mihevitra araky ny toetran'olombelona.

Raha mandinika an'i Jodasy isika dia mahita fa matetika isika no mamadika an'i Jesoa amin'ny fiainantsika raha manao izany amin'ireo kely sy madinika indrindra ka mitady ny tombotsoa ho antsika sy ny voninahitra ho antsika.

Raha mijery an'i Piera isika dia mahita fa matetika isika no mandà an'Andriamanitra sy mandà an'i Jesoa amin'ny fiainantsika satria tsy mifikitra amin'ny tena fitiavana fa mitady hanavo-tena, tsy misy fahasahiana, matahotra.

Raha mandinika ireo olona nilaza hoe “fantsiho amin'ny hazo fijaliana” dia midika fa mifidy an'i Barabasy sy izao tontolo izao. Impiry moa isika no manontany sy mitady hoe: “aiza ny marina” ?

Aleontsika mitsara sy mitsikera toy izay mikatroka amin'ny asa aman-draharaha Kristianina. Impiry isika no manohitra ny rafitra misy, impiry isika no maneso ny namantsika tahaka an'ireo naneso an'i Jesoa.

Soa ihany fa noho ny fahasoavan'Andriamanitra dia misy fotoana isehoantsika tahaka ireo vehivavy masina sy i Joany ka tsy misaraka amin'i Jesoa na inon-kidona na inon-kihatra ary rehefa tsy misaraka fa mitoetra ao Aminy isika dia mankahery antsika Izy. Natolony antsika ny reniny raha nilaza tamin'ilay mpianatra malalany Izy hoe: “indro ny reninao”, ary natolony an-dreniny isika raha nilaza izy tamin'i Masina Maria :“indro ny zanakao”. Teraka ny Eglizy satria manana reny isika ary miara-dàlana amintsika izy.

Ary raha nilaza hoe tanteraka ny zava-drehetra i Jesoa dia azo lazaina fa Evanjelin'ny fandresena ho antsika izany. Ny fandresena ao amin'i Jesoa dia tsy ho entina mirehareha fa ho entina hanompo hanavao an'izao tontolo izao ary izany no antenaintsika raha hankalaza ny Sabotsy masina isika rahampitso. Eo amin'ny tantaran'ny fijalian'i Jesoa Kristy io ny famonjena antsika olombelona, koa enga anie ny fiainantsika nohavaoziny tamin'izy teo amin'ny hazo fijaliana mba hihavao tokoa amin'ny fankalazana ny Asabotsy masina anatin'ny hateloana masina mandeha amin'ny Paka izao. Paka fandalovana miala amin'ny fiainana tsizarizary ka miditra amin'ny fiainam-baovao satria izany no anton'ny nijalian'i Jesoa teo amin'ny hazo fijaliana. Raha mifikitra sy mitoetra Aminy isika sy itoerany dia mamokatra ny fiainantsika ary izany no Paka ho antsika.

Ry Jesoa Kristy Tompo ô, nanolo-tena teo amin'ny hazo fijaliana lanao, natolotrao anay i Masina Maria reninao, koa enga anie izahay noho ny vavaka ataony mba ho olom-baovao ao Aminao ary hifikitra amin'ny hazo fijaliana fa io no làlam-pamonjena ho anay, izany hoe hifantsika miaraka Aminao amin'ny fahotana sy amin'ny ratsy rehetra ataonay izahay ka halevinao ao amin'ny fahafatesanao, halevinao ao am-pasana ny ratsy fa fiainam-baovao no iombonanay Aminao amin'ny alalan'izao fankalazana ny “tridium pascal” izao ka handray ny fahasoavana avy Aminao anie izahay. Enga anie ny fiainanay mba ho fiainana misy Anao manontolo amin'izay mba ho famantaram-pamonjena ho an'ny hafa koa izahay. Amen

Mompera Arseveka Mgr Benjamin Ramaroson